

Nunat Avannarliit Killiit Siunnersuoqatigiiffiata inassuteqaataanut nr. 2/2015-imut Inatsisartut ilaliinissaat pillugu Inatsisartut aalajangiiffigisassaattut siunnersuut:

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa Issittumi nunat tamalaat akornanni unammilleqatigiinnerup annertuneruleriartornerani nukittunerusumik inissisimaqqulluta Nunani avannarlerni killerni assartuinnermut pilersuinnermullu tunngasuni ungasinnerusooq isigalugu ataatsimut anguniagaqarsinnaanermut periarfissat nalilersorlugit misissueqqissaarnermik suliaqaqqullugit.**

(Nunat Avannarliit Killiit Siunnersuisoqatigiiffiannut aallartitat siulittaasuut Lars-Emil Johansen)

### **Akissuteqaat**

(Ineqarnermut, Sanaartornermut Attaveqaqatigiinnermullu Naalakkersuisooq)

### **Siullermeerneqarnera**

Naalakkersuisut sinnerlugit Nunat Avannarliit Killiit Siunnersuisoqatigiiffiannut aallartitat siulittaasuut Hr. Lars-Emil Johansen aalajangiiffigisassatut siunnersuummik saqqummiussinerani qutsavigaara.

Ukiut 30-it matuma sionatigut nunat avannarliit killiit naalakkersuinikkut suleqatigiinnerat pilersinneqarpoq, aammalu nunat avannarliit killiit suleqatigiinnerat akuttunngitsumik Islandimut Savalimmiunullu attaveqarnitsinnut sunniuteqarluartarpoq.

Nunat Avannarliit Killiit pingasut matumani pineqartut assartuussinermi attaveqaqatigiinnermilu ataatsimut suliniutini suleqatigiinnerup nukittorteqqinneqarnissaa iluaqutigisussaagaat Nunat Avannarliit Killiit Siunnersuisoqatigiiffiannit tikkuarneqartoq Naalakkersuisut isumaqatigaat. Taamaattumillu aamma misissueqqissaarnermik, Nunani Killerni Avannarlerni assartuussinerup attaveqaqatigiinnerullu iluani siunissamut ungasissumut ataatsimoorluni periarfissanik nalunaarsuinissamik siunertaqarfiusumik suliaqarnissaq naleqquppoq.

Iisimatitsissutigisinnaavara, Naalakkersuisunit aamma Ineqarnermut, Sanaartornermut Attaveqaqatigiinnermullu Naalakkersuisoqarfimmit assartuussinermi attaveqaqatigiinnermilu Island Savalimmiullu suleqatigilluareeratsigit. Tamatumunnga atatillugu oqaatigisinnaavara, ukioq manna septembarimi Savalimmiuniikkama, tassanilu silaannakkut angallaneq nalunaarasuartaateqarnerlu politikerinut soqutiginnittunullu oqaloqatigiissutigineqarnissaat siunertaavoq, aammalu qaammammi matumani taamatut siunertaqarlunga Islandimut aallassaanga.

Tikeraarnerit taakku nunani avannarlerni killerni assartuussinermi attaveqaqatigiinnermilu suliat assigiinngitsut ataatsimut sunniutaannik paasisimasaqarnera annertuumik nukittortinneqartussaavoq. Tamanna tunngavigalugu Naalakkersuisut naliliipput, suliat assigiinngitsut ataatsimut sunniutigisinnaasaannik piviusunngortitsisarnerit annertusiniarlugit nunat avannarliit killiit suleqatigiinnerisa nukittortinneqarnissaa Kalaallit Nunaannut iluaqutaassasoq. Tamanna innuttaasunut, inuussutissarsiornermut kiisalu nunani killernut avannarlernut annertuumik iluaqutaassaaq.

Taamaalillutik Naalackersuisut assartuussinikkut- aammalu attaveqaqatigiinnikkut suleqatigiinnerup annertusarneqarnissaanik suliniuteqarnissaq Nunat avannarliit killiit suleqatigiilluarnerisa naleqarluarneranut assersuutissatsialattut nalilerpaat. Taamaattorli matumani siunnersuutigineqartoq issittumi suleqatigiinnermut tunngatillugu immikkut iliuusaasutut Naalackersuisut nalilinngilaat.

Taamatut oqaaseqarlunga Naalackersuisut sinnerlugit siunnersuut ilalernerqassasoq inassutigaara, aammalu nunani avannarlerni killerni assartuussinermi attaveqaqatigiinnermilu ataatsimoorluta siunissamut ungasissumut suleqatigiinnitta nukittorteqqinneqarnissaanut qilanaarpunga.

Taamatut oqaaseqarlunga aalajangiiffigisassatut siunnersuut Inatsisartuni kajumittumik suliaassanngorlugu tunniuppara.